



24. august 2018

UKA 2018/101

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Ilaqutariit nukittorsarumallugit ilaqutariinnik siunnersuisartut (coaching) pillugu apeqquteqaat aallaavigalugu oqallinnissamik siunnersuut.
(Inatsisartunut ilaasortaq Nivi Olsen Demokraatit)**

Ilaqutariit tassaapput ataatsimoorfiit susassareqatigiinnerullu qitiat. Ilaquttatsinni qaninnerpaani nukissamik aallertarpugut, inuuneq artornarsivallaaraangat. Ilaquttatsinni asannineq, ikorfartoqatigiinneq isumassorneqarnerlu ulluinnarni pisarpagut. Aamma ilaquttatsinni qitornatta ilinniarpaat isumassuineq imminut akisussaaffigilernissaq inoqatinullu akisussaaqataaneq. Allatut oqaatigalugu nunatta siunissaata toqqammavissinnissaanut atatillugu inuit ataasiakkaat nukittuut pilersinnissaat pingaaruteqarpoq.

Taamaattumik pingaaruteqarluinnarpoq ilaqutariit paarilluarnissaat aamma tulaavittut toqqissisimanartutut. Taamaassaaq ilaqutariit qanoq ittulluunniit pineqaraluarpata, immikkut qitornallit ilaqutariuppata, suaqaatigiit ilaqutariit pineqarpata allatulluunniit ilaqutariilersimasut pineqaraluapata.

Taamatullu oqareerluta puigussanngilarput inuttut tamatta kukkusaratta amingaateqarlutalu. Arlaannarpulluunniit kukkujuitsuunngilaq taamaattumik piffissap ingerlanerani asanerpaasagut annersissinnaasarpagut.

Ullumikkut ilaqutariinnut sullissivinnik 16-nik nunatsinni peqarpugut illoqarfinni, Qaanaami, Upernavimmi, Ilulissani, Qasigiannguani, Qeqertarsuarmi, Kangaatsiami, Aasianni, Sisimiuni, Maniitsumi, Nuummi, Paamiuni, Qaqortumi, Narsami Nanortalimmi, Tasiilami Uummannamilu. Sullivinni taakkunani ilaqutariit katsorsarneqarsinnaapput, siunnersortittoqarsinnaavoq aamma ajornartorsiortunik ikiuisoqarsinnaavoq.

Ilaqutariinnik sullissivinni ilaqutariittut ineriartortinneqartussatut akuerineqassagaanni piomasaaqatit kommunimiit kommunimut assigiinngillat.

Tungaviusumik kommunimi tunguinnermut inunnillu isumaginninnermut sullissisup nalilikkajuttarparaa ilaqutariinnut iluaqutaassanersoq ilaqutariinnut sullissivimmi ilaqutariit sullinneqarnissaat.



Demokraatini isumaqarpugut, ilaqutariinnut sullissiveqartitsineq pitsaasuusooq, taakkunanili sullinneqakkajunnerusarput ilaqutariit inuttut ajornartorsiortut. Kissaatigaarput neqeroorutit ilaneqassasut ilaqutariit inuttut ajornartorsiuteqaqngikkaluit aamma sullinneqarsinnaalersillugit aamma pisortat innersuussuteqaqqaarnissaat aqqusaqqaanngikkaluarlugu.

Ilaqutariit avissaarnerat tarnikkut artornartorsuuvoq aamma akisoorujussuanngorsinnaasarput inunnut ataasiakkaanut pisortanullu assersuutigalugu meeqqanut tapit amerlisinnaammata, meeqqerivinni akeqaqngitsumik ineqartitsinerit amerlisinnaammata aamma ineqarnermut tapiissutit. Inuiaqatigiittut taamaattumik suliniutiginerusariaqarparput ilaqutariit piunnartittarnissaat aamma ilaqutariinnik nukittuunik pilersitsisarnissarput.

Allatut oqaatigalugu pisariaqanngilaq inuttut ajornartorsiuteqarnissaq ilaqutariinnik siunnersuisarneq, ilaqutariinnik ilitsersuineq imaluunniit uani oqarnittuut ilaqutariinnik coaching iluaqutissarsivigerusukkaanni.

Takorloorpara, nuna tamakkerlugu ilaqutariinnik coachisartunik peqalissasugut, ilaqutariinnik ikusartussanik ilaqutariit aserunnginneranni. Aamma innuttaasut kikkulluunniit saaffiginnissinnaatitaassapput pinaveersaartitsinissaq pillugu, tassani ilaqutariinnik siunnersuisoqarsinnaassaaq sakkusanillu tunisisoqartarluni ajornartorsiutigilersimasat qaangernissaannut.

Eqqarsaatiginngilara ilaqutariinnut coachit angalasartuussasut. Paarlattuanik eqqarsaatigaara ilaqutariinnut coachit illoqarfinni nunaqarfinnilu najugaqartuussasut sulillutillu. Soorunami ilinniarsimasuussapput malittaaniillu pikkorissarsimassallutik, kisianni illoqarfimminni nunaqarfimminniluunniit najugaqartuussapput. Kullorsuaq assersuutigisigu. Imaassanngilaq ilaqutariinnut coachi Sisimiuniissasooq Kullorsuarmut tummanngisaannarsimasooq. Naagga, ilaqutariinnut coachi illoqarfimmut nunaqarfimmulluunniit sullivissaminut attuumassuteqassaaq.

Ilaqutariinnut coachit najukkaminni saqqumilaartuussapput, toqqissisimanartooqqullugu saaffiginninnissaq. Tassa ilaqutariinnut coachi ilaqutariinnit pissarsiariuminartuussaaq aamma siunertani annerpaassaaq ilaqutariit ajornartorsiutaannut tunngatillugu siunnersuisoqartarnissaa coachisoqartarnissaalu, inuiaqatigiit toqqammavissaqartikkumallugit ilaqutariinnik nukittuunik aamma ataqatigiilluartunik. Tamatumani siunertaralugu ilaqutariit ajornartorsiutiminnik iluarsisarnissaat najuinnartarnissaallu ilaqutariinnut inuiaqatigiinnullu nuannaarutaasumik.

Coaching ingerlanneqartassaaq ilaqutariit namminneq angerlarsimaffiini.

Takorloorpara aqqissuussineq Namminersorlutik Oqartussat ataaniissasooq, pineqarmat nuna tamakkerlugu suliniutissaq. Misilittagaqalerumalluni immaqa aallarniutigalugu ukiumi ataatsimi misiliutigalugu ingerlatsisoqarsinnaavoq, sumiiffinni assigiinngitsuni pingasuni ilaqutariinnut



coachiliigallarnikkut; illoqarfimmi angisuumi, illoqarfimmi minnerumaami kiasalu
nunaqarfimmi. Taamaasilluta aaqqissuussineq aningaasaqarnerlu pillugit naleqarluartunik
paasissutissani pissarsisinnaassagaluarpugut.

Qilanaarpunga partiit allat Naalakkersuisullu uunga isumassarsiamut isumaasa tusarnissaannut.